

## Kujifunza kwa Umilele,

*Akisha kutujulisha siri za mapenzi Yake, sawa sawa na uradhi wake, alioukusudia katika Yeye huyo. Yaani kuleta madaraka ya wakati mkamilifu, atavijumlisha vitu vyote katika Kristo, vitu vya mbinguni na vitu vya duniani pia. Naam, katika Yeye huyo. Waefeso 1:9, 10.*

**K**adiri tunavyokaribia mwisho wa Historia ya dunia hii, unabii uhusuo siku hizi za mwisho tunapaswa hasa kuujifunza. Kitabu cha mwisho cha Maandiko ya Agano Jipya kimejaa ukweli tunaohitaji kuuelewa. Shetani amefunga macho ya wengi ili kwa urahisi watoe udhuru wa kutojifunza kitabu cha ufunuo. Lakini Kristo kwa njia ya mtumishi wake Yohana ameashiria mambo ambayo yatatokea siku za mwisho aliposema, “heri asomaye na wao wayasikiao maneno ya unabii huu, na kuyashika yaliyoandikwa humo.” Ufunuo 1:3.

Pia Yesu alisema, “Na uzima wa milele ndio huu, wakujue wewe, Mungu wa pekee wa kweli; na Yesu Kristo uliyemtuma.” Yoh. 17:3. Kwa nini basi hatuelewi umuhimu wa ujuzi huu? Kwa nini huu ukweli mtukufu haung’ari mioyoni mwetu na kutetemesha midomo yetu na kutawala Maisha yetu yote?

Katika kutupatia Neno lake, Mungu ametupatia kila ukweli ulio muhimu kwa wokovu wetu. Maelfu wamechota maji toka kwenye visima hivi vya uzima lakini hayapungui wala hayaishi. Maelfu wamemweka Bwana mbele zao na kwa kumtazama wamebadilishwa na kufanana naye. Mioyo yao huwaka ndani yao wanapozungumza juu ya tabia yake, wakieleza kile Kristo Alichokwao na kile walicho kwa Kristo. Lakini watafiti hawa hawajayamaliza mafundisho hayo matakatifu na yenye adhana. Maelfu zaidi wanaweza kujihusisha na kazi hiyo ya utafiti wa siri kuu za wokovu. Kadiri maisha ya Kristo na sifa ya utume Wake yanapotafakariwa, miale ya nuru itang’ara zaidi katika kila jaribio la utafiti wa kuujua ukweli. Kila jaribu jipya la uchunguzi litafumbua jambo fulani lenye kina zaidi ambalo halijapata kugunduliwa hapo awali. Somo hili halikomi. Kujifunza juu ya Kristo kufanyika mwanadamu, kafara yake ya upatanisho na kazi yake ya maombezi, zitashughulisha akili ya mwanafunzi mwenye ari, kwa wakati wote; na akiangalia mbingu na miaka yake isiyoweza kuhesabiwa atashangaa na kusema, “Siri ya Uungu ni kubwa.”

Katika umilele tutajifunza yale ambayo kama tungaliyapokea hapa yangeweza kufungua fahamu zetu. Somo juu ya ukombozi litashughulisha mioyo na mawazo na ndimi za wale waliokombolewa kwa milele zote. Wataelewa ukweli ambao Kristo alihitaji sana kuwafunulia wanafunzi Wake lakini hawakuwa na imani ya kuweza kuupokea. Milele na milele maelezo mapya ya ukamilifu na utukufu wa Kristo yatajitokeza. Kwa zama zote za umilele yule mwenye nyumba mwaminifu atatoa kutoka hazina yake vitu vipya na vya kale. (Lulu za Uzima. Uk. 86, 87).